

08.10.2019

UKA2019/142

**Umiarsuarni inuttat pillugit inatsisip Kalaallit Nunaanni atuutilersinneqarnissaannik peqqussutip Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut**

(Ineqarnermut Attaveqaaqatigiinnermullu Naalakkersuisoq)

Umiarsuarni inuttat pillugit Inatsisip Kalaallit Nunaanni atuutilersinneqarnissaannik, Inatsisartut aalajangiiffigisassaattut Naalakkersuisut siunnersuuteqarnerannut Siumumiit qutsavigaagut imaattunillu oqaaseqarfigissavagut.

Naalakkersuisut saqqummiussissutimi ilaanni oqaatigisaat, Ukiuni kingullerni imarsiornermi qallunaat inatsisaanni arlalinnik allannguuteqartarsimasumi Kalaallit Nunaat malinnaatinneqartarsimangilaq, tamannalu Nunatsinniit politikikkut inuussutissarsionermillu suliaqartunit sivisuumik ujartorneqartarsimavoq.

Aalajangiiffigisassatut siunnersuutip Inatsisartunit akuerineqarneratigut ilaatigut siunissami Kalaallit imarsiortut Nunani tamalaani imarsiortarnerat ajornannginnerulissaaq, Naalakkersuisut saqqummiussissutiminni ilaatigut taamatut tunngavilersornerannut Siumumiit taperserpagut.

Nunatsinnilu Aqumiut peqatigiiffiat AK peqatigalugu Nunatsinni umiarsuarni inuttat illersugaannginnerat pillugu assut ilungersuuteqartoq aamma Siumumiit malinnaavigilluarparput, Naalakkersuisullu tamatuminna iluarsiniaqataarusunnerannik nersualaarumavagut.

Tassami Aqumiut peqatigiiffiat AK-lu minnerunngitsumillu umiarsuaatillit allallu attuumasuteqartut peqatigalugit suliaq naammasineqartariaqalermat, taamaalilluni Nunatsinni umiarsuarni inuttat illersugaalerniassammata.

Maluginiakkattalu ilagaat inatsisip pineqartup Nunatsinnut tungasortaa, Nunatsinnut naleqqussaavigineqartarnissaa ammatsinneqartoq tamannalu pingaarluinnartuttut Siumumiit isumaqarfigigatsigu erseqqissaatigissavarput.

Aalajangiiffigisassatut siunnersuutigineqartoq Inatsisissaq pillugu suliamut attuumassuteqartunut tusarniutigineqarsimasussaagaluarnersoq Siumumiit apeqquserparput, tassami Inatsisissatut siunnersuut arlalippassuarnik allannguutinik maliteqarmat.

Taamatut oqaaseqarluta Siumumiit aalajangiiffigisassatut siunnersuut aappassaaniinnginnerani ataatsimiitaliamut attuumassuteqartumut ingerlatipparput, ataatsimiitaliamilu ilaasortat sulilluarnissaannik kissaallugit.

Qujanaq

Henrik Fleischer, Siumut